

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Siunnersuutikkut 2020-mut aningaasanut inatsisip akuersissutigineqarnissaanut killiliussaq ullormut 21. november 2019-imut sivitsorneqarpoq. Tamatumalu nassatarisaanik Inatsisartunut kommunalbestyrelsinullu killiliussat arlallit allat sivitsorneqarput, takukkit siunnersuummi immikkoortut pingaarnert aalajangersakkanullu ataasiakkaanut nassuiaatit.

2. Siunnersuutip imarisai pingaarnert

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 15-imi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni Aningaasanut Inatsit akuersissutigineqartassasoq allassimavoq.

Aningaasanut inatsisissatut siunnersuutip isumaqatiginninniutigineqarnerani piffissamik annertunerusumik pisariaqartitsineq tunuliaqutaralugu, matumuuna 2020-mut aningaasanut inatsisip akuersissutigineqarnissaanut piffissaliussap sivitsorneqarnissaa siunnersuutigineqarpoq.

Tamatumali nassatarisaanik piffissaliussat allat aamma sivitsorneqartariaqarput:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nuna tamakkerlugu akileraarutit aamma nuna tamakkerlugu immikkut akileraarutit procentii qaammatisiutit malillugit ukioq pineqartoq sioqqullugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut annertussilerneqartarput. Taamaammat siunnersuutaavoq ukioq manna piffissaliussaq, aningaasanut inatsisissap akuersissutigineqarnissaanut piffissaliussaq assigalugu 26. novemberimut sivitsorneqassasoq.

Aningaasarsianit akileraarutit pillugit Inatsisartut inatsisaanni (§ 62, imm. 2-mi) aalajangersarneqarpoq kommunimut akileraarutissap procentia qaammatisiutit malillugit ukioq pineqartoq sioqqullugu 1. december nallertinnagu kommunalbestyrelsimit aalajangerneqartassasoq. Kommunit missingersuusiortarnerat, aningaasanik tigoriaannaateqarnerat, naatsorsuutaat, kukkunersuusoqarnerat kiisalu karseqarnerat naatsorsuuseriveqarnerallu pillugit Namminer-sorlutik Oqartussat nalunaarutaanni nr. 3, 3. februar 2012-meersumi aalajangersarneqarpoq, kommunit ukiumut aningaasanut inatsiseqarfiusumut tullermut missingersuutaat kingusinner-

paamik kommunimut akileraarutip procentiata, aningaasarsianit akileraarutit pillugit Inatsisartut inatsisaat malillugu annertussusilerneqarnissaanut piffissaliussaq nallertinnagu akuersissutigineqarsimassasut.

Aningaasanut inatsisissap suliarineqarnissaanik kinguartitsinerup aammattaq kingunerissavaa kommunit kommunalbestyrelsillu 2020-imut missingersuutitik kommunimullu akileraarummik akuersissuteqarnissaminnut piffissakinnerunissaat, tamannalu kommunit aalajangersakkanik taakkuninnga malinninniarnissaannut ajornakusoortitsisinnaavoq. Taamaammat siunnersuutaavoq 2020-imut kommunimut akileraarummik annertussusiliinissamut piffissaliussaq 2. decemberimut sivitsorneqassasoq.

Meeqqanut suli atualinngitsunut perorsaanikkut inerikkiartuutaasumik ulluunerani neqeroorutitut akiliteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi (§ 1, imm. 1-imi) aalajangersarneqarpoq, kommunalbestyrelsi meeqqanut suli atualinngitsunut ulluunerani neqeroorutitut ukiumi tullermi akigititassanik kingusinnerpaamik novemberimi aalajangersaasassasoq. Aningaasanut inatsisip akuersissutigineqarnissaanut piffissaliussamik kinguartitsineq kommunit aalajangersakkanik taakkuninnga malinninniarnissaannut ajornakusoortitsisinnaavoq. Taamaammat siunnersuutaavoq 2020-imi akigititassanik annertussusiliinissamut piffissaliussaq 2. decemberimut 2019-imut sivitsorneqassasoq.

3. Pisortanut aningaasatigut allaffissornikkullu sunniutissai

Siunnersuutip pisortanut sunniuteqangaarnissaa naatsorsuutigineqanngilaq. Kisianni missingersuutitik, akileraarusiissutissat annertussusaannik aammalu meeqqanik paaqqinninnermut akigititassanik nutaanik akuersissuteqarnissat pisarnermit kingusinnerusuklut pissapput.

4. Inuussutissarsiutitik ingerlataqartunut il. il. aningaasatigut allaffissornikkullu sunniutissai

Siunnersuut inuussutissarsiutitik ingerlataqartunut aningaasatigut sunniuteqanngilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqanngilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqanngilaq.

7. Naalagaaffeqatigiinnermut Namminersorlutillu Oqartussanut tunngasut

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqanngilaq.

8. Oqartussaasunik kattuffinnillu tusarniaaneq

Siunnersuut piffissakilliorneq pissutigalugu tusarniaassutigineqanngilaq. Siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit suliarineqarpoq, soorluttaaq kommunit tamatuminnga ilisimatinneqareersut.

Siunnersuummi aalajangersakkanut ataasiakkaanut oqaaseqaatit

§ 1-imut

Imm 1-imut.

Inatsisartut 2020-imut aningaasanut inatsisaata qaammatisiutit malillugit ukioq akileraarfiusoq sioqqullugu kingusinnerpaamik 21. november akuersissutigineqarnissaa siunnersuutigineqarpoq. Taamaaliornikkut Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussaq atuuttoq (15. november) avaqqunneqassaaq.

Imm. 2-mut

2020-imut nuna tamakkerlugu akileraarutip qaammatisiutit malillugit ukioq akileraarfiusoq sioqqullugu kingusinnerpaamik 21. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61-imi piffissaliussat atuuttoq (15. november) avaqqunneqassaaq.

Imm. 3-mut

2020-mut nuna tamakkerlugu immikkut akileraarutip qaammatisiutit malillugit ukioq akileraarfiusoq sioqqullugu kingusinnerpaamik 21. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 64 imm. 2-imi piffissaliussat atuuttoq (15. november) avaqqunneqassaaq.

Imm. 4-mut

Kommunimut akileraarutip 2020-mi procentiata qaammatisiutit malillugit ukioq akileraarfiusoq sioqqullugu kingusinnerpaamik 2. december annertussusilerneqarnissaa

siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 62, imm. 2-mi piffissaliussaq atuuttoq (1. december) avaqqunneqassaaq. Kommunit akileraarummik akuersissuteqarnissamut piffissaliussamik allannguinerup aammattaaq kingunerissavaa kommunit 2020-mut missingersuutaasa, Kommunit missingersuusiortarnerat, aningaasanik tigorianaateqarnerat, naatsorsuutaat, kukkuniuuisoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaat nr. 3, 3. februar 2012-imeersoq naapertorlugu akuersissutigineqarnissaannut piffissaliussap taamatulli tassaalernissaa 2. december 2019.

Imm. 5-imut

Kiisalu siunnersuutigineqarpoq, meeqqat suli atualinngitsut kommunit ulluunerani neqeroorutaannut 2020-mi akiliutissat kingusinnerpaamik 2. december 2019-imi annertussusilerneqassasut. Taamaaliornikkut Meeqqanut suli atualinngitsunut perorsaanikkut ineriartuutaasumik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi § 1, imm. 1-imi piffissaliussaq atuuttoq (kingusinnerpaamik novemberimi) avaqqunneqassaaq.

§ 2-mut

Inatsisip tamanut nalunaarutigineqarnerata aqaguani atuutilernissaa, ullorlu 1. januar 2020-mi atorunnaarnissaa siunnersuutigineqarpoq.